

að mati skattstjóra, enda hafi fjölskylduástandur gjaldanda breyst eða aðrar aðstæður skert gjaldþol hans verulega.

Ríkisskattstjóri setur nánari reglur um ákvörðun á takmörkun greiðsluskyldu og önnur atriði varðandi framkvæmd þessarar greinar.

5. gr.

Ákvörðun varðandi umsókn skal skattstjóri tilkynna gjaldanda og ef fallist er á umsókn skal niðurstaðan einnig tilkynnt innheimtuaðila.

6. gr.

Um greiðslur þinggjalda á árinu 1984 fer að öðru leyti samkvæmt ákvæðum XIII. kafla laga nr. 75/1981 um tekjuskatt og eignarskatt.

7. gr.

Reglugerð þessi, sem sett er samkvæmt heimild í 110. gr. og 119. gr. laga nr. 75/1981 um tekjuskatt og eignarskatt, öðlast þegar gildi.

Fjármálaráðuneytið, 22. desember 1983.

Albert Guðmundsson.

Arni Kolbeinsson.

REGLUGERÐ

fyrir Hitaveitu Hveragerðis.

1. ALMENN ÁKVÆÐI

1.1. Gildissvið.

Reglugerð þessi gildir um allt lögsagnarumdæmi Hveragerðishrepps.

1.2. Stjórn hitaveitunnar.

Hreppsnefnd Hveragerðishrepps fer með stjórn Hitaveitu Hveragerðis og skipar 5 manna nefnd fyrir hitaveitu og vatnsveitu. Þegar þörf þykir á að mati hreppsnefndar skal skipaður sérstakur hitaveitustjóri.

1.3. Einkaleyfi hitaveitu.

Hitaveita Hveragerðis hefur innan hreppsmarkanna einkaleyfi á dreifingu og sölu á heitu vatni, með þeim takmörkunum, sem um getur í 2. og 7. grein samnings landbúnaðar-ráðuneytisins og hreppsnefndar Hveragerðis frá 16. maí 1952 um not jarðhita í Hveragerðis-hreppi og síðustu málsgrein þessarar greinar. Þó getur hreppsnefnd heimilað einstaklingum eða félögum að annast byggingu og rekstur fjarhitunarkerfis á tilteknum svæðum undir yfirstjórn hitaveitunnar.

1.4. Utanhússlagnir.

Hreppsnefnd lætur leggja allar utanhússlagnir, aðalæðar, dreifiæðar og heimæðar inn í hús, sbr. þó 1. mgr. liðar 1.3.

1.5. Viðhaldsskylda.

Hitaveitan hefur eignarrétt og viðhaldsskyldu á dreifiæðum sínum, svo og heimæðum inn í hús nema notaður sé forhitari utanhúss, þá að honum. Húseiganda er óheimilt að hylja þessar lagnir eða gera þær óaðgengilegar til eftirlits eða viðgerða.

1.6. Afnot varmaorku.

Sú varmaorka, sem hitaveitan lætur í té, er ætluð til upphitunar húsa. Nú kann að koma fram ósk um að nota varmaorku til annarra þarfa en greinir í 1. mgr. og þarf þá til þess heimild hreppsnefndar.

1.7. Nýting heits vatns.

Nýting heita vatnsins skal vera slík að hitastig notaðs vatns (frárennslisvatns) frá gróðurhúsum og öðrum húsum skal ekki fara yfir 45°C (gráður á celsíus).

Til að tryggja góða varmanýtni í gróðurhúsum skulu röralengdir minnst vera sem samsvarar 1.7 m af 2" röri á fermetra gróðurhúss. Aðeins eitt útrennsli skal vera frá hverri gróðrarstöð og innsiglaður útrennslisloki þar á.

Einnig skal vera innsiglað framhjálaup við útrennslislokann og mega aðeins starfsmenn hitaveitunnar rjúfa þetta innsigli.

1.8. Bótaskylda hitaveitu.

Hitaveitan er ekki bótaskyld, þótt notendur verði fyrir tjóni vegna ófullnægjandi varmaflutnings og eigi heldur vegna rafmagnstruflana, breytinga á borholum og hverum eða öðrum óviðráðanlegum orsökum. Þá er hitaveitan ekki bótaskyld, þótt tjón verði á mönnum, munum eða eignum af heitu vatni eða gufu frá varmalögnum innanhúss enda þótt kerfið hafi staðist nauðsynlega þrýstiprófun hitaveitunnar, og er sú prófun gerð á ábyrgð húseiganda.

1.9. Takmörkun varmanotkunar.

Hitaveitan getur fyrirskipað takmörkun á varmanotkun ef hún telur það nauðsynlegt, eða lokað varmaæð vegna hreinsana eða viðgerða. Full varmagjöld ber að greiða, þótt notandi hafi orðið fyrir lokun af því tagi, er um ræðir í 1. mgr.

1.10. Umsóknir.

Nú hyggst húseigandi leggja hitakerfi í hús sitt eða gera breytingu á eldra kerfi, og skal hann þá með minnst 7 daga fyrirvara senda umsókn um það til skrifstofu hitaveitunnar. Umsókn skal rita á eyðublað, sem skrifstofan lætur í té, og skal hún undirrituð af eiganda hússins eða fullgildum umboðsmanni hans. Umsókn skal fylgja uppdráttur gerður af sérfróðum manni af hitakerfi því, sem tengja skal hitaveitunni.

1.11. Uppdrættir.

Uppdrættir skulu gerðir á haldgóðan pappír og þannig frágengnir, að ekki máist letur við geymslu. Stærð skal vera DIN A2 (42,0 × 59,4 cm) eða margfeldi af þeirri stærð. Lagnir skulu sýndar á rúmteikningu með jöfnum einingum á árum í mælikvarða 1:50 eða 1:100, en grunnmyndir í mælikvarða 1:100 eða 1:50. Sérteikningar skulu gerðar í mælikvarða 1:20, 1:10, 1:5 eða stærri.

Uppdrættir skulu sýna allar lagnir, raufar og göt í steypu fyrir slíkar lagnir og allt fyrirkomulag við tengingu hitaveitu. Tilgreina skal í metrakerfi stærðir á hitunartækjum, ofnum, loftristum og tengingum þeirra við lofthitunarkerfi, svo og önnur mál, sem nauðsynleg eru. Ef byggingarfulltrúi telur nauðsynlegt, getur hann krafist útreikninga.

1.12. Samþykkt uppdrátta.

Þegar byggingarfulltrúi hefur samþykkt uppdrátt, skal hann árita tvö eintök hans. Annað eintakið varðveitir hann í skjalasafni hreppsins, en hitt eintakið afhendist umsækjanda. Meistari sá, sem ábyrgð ber á verkinu, skal áður en það hefst, rita nafn sitt á eintak það sem geymt er í skrifstofu hitaveitu. Með áritun tekur byggingarfulltrúi enda ábyrgð á að unnt sé að framkvæmda viðkomandi verk eða því að kerfi sé rétt útreiknað.

1.13. Meistarar.

Meistari sá, sem tekur að sér verk samkvæmt reglugerð þessari, ber ábyrgð á að allar lagnir séu í samræmi við reglugerð þessa, nánari fyrirmæli, er kunna að vera sett og samþykktu uppdrætti.

1.14. Eftirlit.

Hitaveitan skal hafa eftirlit með því, að nýlagnir séu í samræmi við samþykktan uppdrátt og reglugerð þessa. Engar hitalagnir má hylja fyrr en þær hafa verið viðurkenndar af hitaveitunni. Álíti eftirlitsmaður hitaveitunnar, að verk sé eigi framkvæmt skv. ákvæðum reglugerðar þessarar eða öðrum reglum er settar kunna að verða, getur hann stöðvað verkið, þar til bætt hefur verið úr því sem áfátt kann að vera.

1.15. Eftirlitsmaður.

Eftirlitsmaður hitaveitu skal, meðan á verki stendur hafa frjálsan aðgang að hitalögnum bæði innan húss og utan.

1.16. Dælur.

Óheimilt er að tengja dælur við heimæðar nema skriflegt leyfi byggingarfulltrúa sé fyrir hendi, og þannig frá dælu gengið að ekki valdi óþægindum.

1.17. Gjaldskrá.

Hreppsnefnd setur hitaveitunni gjaldskrá.

2. SÉRÁKVÆÐI

2.1. Efni og frágangur.

Um allar lagnir ofna og frágang þeirra, gilda ákvæði byggingarreglugerðar eftir því sem þau eiga við (sjá sérstaklega 8. kafla).

2.2. Forhitara fyrir ofna- og neysluvatn.

Um forhitara gilda ákvæði í 8. kafla byggingarreglugerðar og ákvæði Í.ST 67. Forhitara skal staðsetja í sérstökum klefum sem séu minnst 1,0 m² að flatarmáli og með minnst 1,80 m lofthæð. Gufuhitaðir forhitara skulu aldrei staðsettir inn í íbúðarhúsum, nema þeir séu í rakaheldum klefa, sem ekki sé innangengt í. Í forhitarklefa skal vera niðurfall í gólfi.

2.3. Refsiákvæði.

Um brot á reglugerð þessari gilda ákvæði í IX. kafla byggingarreglugerðar.

ÁKVÆÐI TIL BRÁÐABIRGÐA

Eigendur þeirra gróðurhúsa sem fullnægja ekki ákvæðum í grein 1.7. fá frest til 1. maí 1984 til að sameina frárennsli frá gróðrarstöð sinni svo aðeins verði 1 útrennsli með framhjáhlupi.

Ákvæði í grein 1.7. um að hitastig frárennslisvatns verði 45°C skal koma til framkvæmda ekki síðar en 1. júní 1984, en þangað til verður leyft að hitastig frárennslisvatns verði 55°C. Ákvæði í grein 1.7. um lágmarksröramagn í gróðurhúsum skal vera fullnægt ekki síðar en 31. des. 1984.

Reglugerð þessi sem samin er og samþykkt af hreppsnefnd Hveragerðishrepps staðfestist hér með samkvæmt 29. gr. orkulaga nr. 58/1967 til þess að öðlast þegar gildi og birtist til eftirbreytni öllum þeim, sem hlut eiga að máli. Jafnframt er úr gildi felld reglugerð nr. 135/1962 um Hitaveitu Hveragerðis.

Iðnaðarráðuneytið, 21. desember 1983.

F. h. r.
Páll Flygenring.

Guðrún Skúladóttir.

REGLUGERÐ

um bann við ofbeldiskvikmyndum.

1. gr.

Skoðun kvikmynda skv. 2. gr. laga nr. 33 frá 23. mars 1983 um bann við ofbeldiskvikmyndum fer fram í Reykjavík, nema leyfð hafi verið skoðun annars staðar skv. 58. gr. 5. mgr. laga nr. 53/1966. Þeim, sem flytur kvikmynd inn eða hyggst selja kvikmynd, dreifa henni eða sýna hana ber að koma myndinni til skoðunarmanna nema skoðunarmenn þessir hafi áður skoðað myndina og lýst því, að hún brjóti ekki gegn 1. gr. laga nr. 33/1983. Skoðunarmenn geta krafist tollskjala, ef þeir telja ástæðu til.

2. gr.

Tveir skoðunarmenn hið fæsta skulu skoða hverja mynd. Greini þá á, skal kveðja hinn þriðja til og ræður þá meirihluti skoðunarmanna.

Gefa skal skriflegt vottorð um, að skoðun hafi farið fram og að skoðunarmenn telji kvikmyndina ekki brjóta gegn 1. gr. laga nr. 33/1983. Hið skoðaða eintak skal merkt.

Ríkisútvarpið annast skoðun kvikmynda, sem það sjónvarpar en menntamálaráðherra er heimilt að ákveða, að tiltekin mynd skuli skoðuð af skoðunarmönnum kvikmynda eftir VI. kafla laga nr. 53/1966. Hafa þeir þá úrskurðarvald um það, hvort myndin brjóti gegn 1. gr. laga nr. 33/1983.

3. gr.

Fyrir skoðun eftir lögum nr. 33/ 1983 og reglugerð þessari skal greiða 100 krónur í ríkissjóð nema gjald sé greitt eftir 58. gr. 7. mgr. laga nr. 53/1966.

4. gr.

Brot gegn reglugerð þessari varðar refsingu eftir 4. gr. laga nr. 33/1983.

5. gr.

Reglugerð þessi, sem sett er skv. lögum nr. 33/1983, öðlast þegar gildi og gildir til ársloka 1987 nema annað verði síðar ákveðið.

Menntamálaráðuneytið, 21. desember 1983.

Ragnhildur Helgadóttir.

Knútur Hallsson.